

四庫全書

子部

欽定四庫全書

子部

冊府元龜卷四百三十六

三五

詳校官中書臣羅錦森

侍讀臣孫球覆勘

總校官庶吉士臣何思鈞

校對官中書臣金光悌

謄錄監生臣馮堪

欽定四庫全書

冊府元龜卷四百三十三

宋 王欽若等撰

將帥部

輕財示弱

輕財

夫戰之所尚其惟得衆師所以和繇乎布惠是以古之良將受命忘家視卒如子饑寒先恤甘苦皆分饗必盡於食租身不專其君賜豈有他哉蓋所以奉腹心之寄

宣爪牙之用極士之歡心致人之死力而已故能奉辭將罰治兵鞠旅撫士御衆多多而益辦料敵制勝堂堂之必擊然後式遏寇虐掃清疆場揚威邊野令行百萬圖芳鼎彞功齊四七語有之曰天時不如地利地利不如人和非德施何以能之哉

趙趙奢為將王及宗室所賞賜盡以予軍吏士大夫

漢竇嬰為大將軍嬰言袁盎樂布諸名將賢士在家者

進之所賜金陳廊廡下

廡堂下周屋也廡門屋也音侮

軍吏過輒令財取

為用

財與裁同謂裁量而用之也

金無入家者

李廣累遷輕車將軍歷七郡太守前後四十餘年得賞

賜輒分其戲下

戲讀曰麾

飲食與士卒共之家無餘財終不

言生產事

後漢吳漢為大司馬嘗出征妻子在後買田業漢還讓之曰軍帥在外吏士不足何多買田宅乎遂盡以分與昆弟外家

寇恂為執金吾所得秩奉厚施朋友故人及從吏士嘗

曰吾因士大夫以致此其可獨享之乎

馬援字文淵拜隴西太守監揚武將軍馬成破先零羌
光武以璽書勞之賜牛羊數頭援盡頒諸賓客

祭遵字弟孫為人廩約小心克已奉公光武以為刺姦
將軍賞賜輒盡與士卒家無私財

滕撫為九江都尉討平妖賊所得賞賜盡分與麾下

董卓桓帝末以六郡良家子為羽林郎從中郎將張奐
為軍司馬共擊漢陽叛羌破之拜郎中賜縑九千匹卓

曰為者則已有者則士

為功者雖已
共有者乃士

乃悉分與吏兵無

所留

魏曹真累遷大司馬每征行與將士同勞苦軍賞不足輒以家財頒賜士卒皆願為用

夏侯惇為大將軍性清儉有餘財輒以分施不足資之於官不治產業

于禁為虎威將軍持軍嚴整得賊財物無所私入

徐邈為涼州刺史建威將軍破叛羗有功賞賜皆散與

將士無入家者妻子衣食不充明帝聞而嘉之隨時供給其家

胡質為東莞太守每軍功賞賜皆散之於衆無入家者在郡九年吏民便安將士用命遷荊州刺史加振威將軍

田豫為護烏丸鮮卑校尉後為護匈奴中郎將并州刺史豫清約儉素賞賜皆散之將士每胡狄私遺悉簿藏官不入家家常貧匱雖殊類咸高豫節

吳孫皎字叔朗遷都護征虜將軍代程普督夏口輕財
能施

程普為盪寇將軍於諸將最年長時人皆呼程公性好
施與喜士大夫

朱據為左將軍輕財好施祿賜雖豐而不足用

朱桓累遷前將軍輕財貴義愛養吏士贍護六親俸祿
產業皆與其分

晉羅憲初仕蜀為宣信校尉輕財好施不營產業

羊祜為征南大將軍立身清儉被服率素祿俸所資皆以贍給九族賞賜軍士家無餘財

祖逖為奮威將軍豫州刺史逖獲駿馬蓬陂塢主陳川將李頭甚欲之而不敢言逖知其意遂與之逖克已務施不畜資產

紀瞻為領軍將軍兼散騎常侍及王敦之逆明帝使謂瞻曰卿雖病但為朕卧護六軍所益多矣乃賜布千疋瞻不以歸家分賞將士

王敦為廣武將軍初尚武帝女襄城公主後天下大亂
敦悉以公主時侍婢百餘人配給將士金銀寶物散之
於衆單車還雒

宋朱脩之為寧蠻校尉雍州刺史脩之治身清約凡所
贈賂一無所受有餉或受之而旋賞驍雄陳宣帝深嘆
美之

唐尉遲敬德太宗貞觀中歷靈廓夏三州都督敬德輕
於貨財所得遺賜多散之於士卒及故舊親族

李勣累為行軍總管前後戰勝所得金帛皆散之將士
裴行儉為洮州道左二軍總管詔賜都友等資產金銀
器四三千餘事駸馬稱是并分給親故副使已下數日
便盡

李叔明為太子太傅閬州人本姓鮮于代宗大歷中賜
姓李氏叔明總戎年深家代為豪族兄仲通天寶末為
京兆尹劔南節度使兄弟並涉學輕財好施

馬燧為河東節度討田悅兵大敗先戰燧誓於軍中

戰勝請以家財行賞既戰勝盡其私積以頒將士德宗聞而嘉之乃詔度支出錢伍萬貫行賞還其家財

石雄為豐州刺史天德防禦使雄臨財甚廉每破賊立功朝廷時有賜與皆不入私室置於軍門首取一分餘並分給以此軍士感義皆思奮發

後唐王晏球為宋州節度使充招討使攻圍定州晏球能與將士同甘苦所得祿賜私財盡以饗士

趙鳳為邢州節度使在鎮所請俸祿之餘分給將校賓

佐故雖危難之中軍民帖然

王思同明宗在軍時素知之即位後用為同州節度使未幾移鎮隴右思同好文士無賢不肖必館接賄遺歲費數十萬

示弱

夫兵唯凶器戰實詭道譎而不正雖或見譏道而後權益有明訓矧殺敵致果唯利是圖後實先聲以奇制勝是知晉侯退舍得臣遂驕楚子羸師季良乃黜信翁張

之良術成敗之要樞也然仁者之師無敵於天下聖人之守遠在於四夷好謀而成雖兵家之常道不爭而勝乃用武之茂功較而論之固有間矣

趙將李牧嘗居代鴈門備匈奴約曰匈奴即入盜急入收保有敢捕虜者斬匈奴謂牧為怯趙王讓牧牧如舊王怒使他人代將歲餘匈奴每來出戰數不利復遣牧牧至如故約匈奴終歲無所得終以為怯邊士皆願一戰於是乃具選兵車得千三百乘騎萬三千匹百金之

士五萬人彀弓弩者十萬人悉勒習戰大縱畜牧人民
滿野匈奴小入佯北不勝以數千人委之單于聞之大
喜率衆來寇牧多為奇陣張左右翼擊之大破殺匈奴
十餘萬騎單于奔走十餘歲不敢近邊

田忌為齊將韓魏相攻忌率兵伐魏魏將龐涓聞之去
韓而歸孫臏謂田忌曰彼三晉之兵素皆悍勇而輕齊
齊號為怯善戰者因其勢而利導之兵法百里而趨利
者蹶上將軍

蹶猶挫也
蹶紀劣切

五十里走者半至使齊軍入魏

地為十萬竈明日為伍萬竈又明日為二萬竈涓行三日大喜曰我固知齊軍怯入吾地三日士卒亡者過半矣乃棄其步兵與其輕銳倍日併行逐之併畢正切孫子度其期當至馬陵道狹而旁多阻隘可伏兵乃大斫樹白而書之曰龐涓死此下於是令萬弩夾道而伏期日暮見火舉而俱發龐涓夜至斫木下見白書乃鑽火燭之讀書未畢齊軍萬弩俱發軍大亂龐涓乃自剄

田單齊將也燕軍大破齊國田單守即墨知士卒可用

乃身操版挿與士卒分功妻妾編於行伍之間盡散飲
食饗士令甲卒皆伏使老弱女子乘城遣使約降於燕
燕軍皆呼萬歲田單又收城中金得千鎰令即墨富豪遺
燕將書曰即墨即降願無掠擄吾族家妻妾令安堵燕
將大喜許之燕軍繇此益懈田單出軍擊大敗之

漢韓信為相國擊齊楚使龍且將號稱二十萬救齊且
與信夾濰水陳信乃夜令人為萬餘囊盛沙以壅水上
流引兵半渡擊龍且佯不勝還走龍且果喜曰固知信

怯遂追渡水信使人決壅囊水大至龍且軍大半不得渡急擊破之

後漢吳漢為大司馬伐公孫述時漢軍餘七日糧陰具船欲遁去蜀郡太守張堪聞之馳往見漢說述必敗不宜退師之策漢從之乃示弱挑敵述果自出戰死城下耿弇為建威大將軍討張步弇攻步臨淄拔之入據其

城步與其三弟藍弘壽及故大槍渠師重異等兵

重姓異名

也號二十萬至臨淄大城東將攻弇弇先出淄水上與

重異遇突騎欲縱奔恐挫其鋒令步不敢進欲示弱以
盛其氣乃引歸小城陳兵於內步氣盛直攻奔營與奔

裨將劉歆等合戰奔升王宮環臺望之

臨淄本齊國所
都即齊王宮中

環臺也視歆等鋒交乃自引精兵以橫突步陣於東城下

大破之

魏陳登字元龍為伏波將軍孫策遣軍攻登於匡琦城
登閉門自守示弱不與戰將士銜聲寂若無人登垂城
望形勢知其可擊乃申令將士宿整兵器昧爽開南門

擊破之

晉李矩字世廻太尉荀藩承制建行臺假矩滎陽太守
元帝加矩冠軍將軍後劉聰遣從弟暢步騎三萬討矩
屯于韓王故壘相去七里遣使招矩時暢卒至矩未暇
為備遣使奉牛酒詐降于暢潛匿精勇見其老弱暢不
以為虞大饗渠帥人皆醉飽矩謀夜襲之暢僅以身免
梁韋濬為左將軍南郡太守時會司州刺史馬仙琕北
伐還軍為魏人所躡三關擾動詔濬督衆軍援馬濬至

安陸增築城二丈餘更開大塹起高樓衆頗譏其示弱
澹曰不然為將當有怯時不可專勇是時元英復追仙
琕將復郟陽之耻聞澹至乃退高祖亦詔罷軍

王僧辯為征東大將軍時侯景陷京師僧辯赴援次于
南洲賊帥侯子鑒自率步騎萬餘人於岸挑戰又以鵠
舸千艘竝載戰士兩邊悉八十棹棹手皆越人去來趣
襲捷過風電僧辯乃麾細船皆令退縮悉使大艦夾泊
兩岸賊謂水軍欲退爭出趨之衆軍乃棹大艦截其歸

路鼓譟大呼合戰中江賊悉赴水

陳侯安都為南徐州刺史高祖東討杜龕安都留臺居
守徐嗣徽任約等引齊寇入據石頭游騎至于闕下安
都閉門偃旗幟示之以弱令城中曰登陴者賊者斬及
夕賊收軍還石頭安都夜令士卒密營禦敵之具將旦
賊騎又至安都率甲士千三百人開東西門與戰大敗
之賊乃還石頭不敢進逼臺城

陸子隆為明威將軍廬陵太守時周迪據臨川及東昌

縣人修行師應之率兵以攻子隆其鋒甚盛子隆設伏於外仍閉門偃甲示之以弱及行師至腹背擊之行師大敗因乞降許之送京師

後魏費穆孝明時蠕蠕入寇涼州以穆為輔國將軍假征虜將軍兼尚書左丞西北道行臺仍為別將往討之穆至涼州蠕蠕遁走穆與所部曰夷狄獸心惟利是視見敵便走乘虛復出今王師來討雖畏威遁跡然軍還之後必來侵暴今欲羸師誘致冀獲一戰若不令其破

膽終恐疲於奔命衆咸然之穆乃簡練精騎伏於山谷使羸步之衆為外營以誘之賊騎覘見謂為信弱俄而競至穆伏兵奔擊大敗之斬其帥郁厥烏爾侯斤十代等獲生口雜畜甚衆

南齊周山圖為龍驤將軍時豫章賊張鳳聚衆康樂山斷江劫抄臺軍主李雙蔡保數遣軍攻之連年不擒至是軍主毛寄生與鳳戰於豫章江大敗明帝復遣山圖討之山圖至先羸兵偃衆遣軍主龐嗣厚遣鳳要出會

聚聽以兵自衛鳳信之行至望蔡山圖設伏兵於水側擊斬鳳首衆百餘人來降

隋于仲文高祖時為大將軍尉遲迥之亂遣仲文詣維陽發兵討之仲文軍至汴州之東次蓼隄去梁郡七里迥將檀讓擁衆數萬仲文以羸師挑戰讓悉衆來拒仲文偽北讓軍頗驕於是遣精兵左右翼擊之大敗讓軍生獲五千餘人斬首七百級進攻梁郡迥守將劉子寬棄城遁走仲文追擊擒斬數千人子寬僅以身免及煬帝

大業中為光祿大夫遼東之役仲文率軍指樂浪道軍次烏骨城仲文簡羸馬驢數千置於軍後既而率眾東過高麗出兵掩襲輜重仲文迴擊大破之

董純為右衛將軍彭城留守大業中彭城賊張大彪宗世模等眾至數萬保懸薄山寇掠徐充純將兵討之純初閉營不與戰賊屢挑之不出賊以純為怯不設備縱兵大掠純選精銳擊賊合戰於昌慮大破之斬首萬餘級築為京觀

王世充為江都郡丞領江都宮監齊郡賊帥孟讓自長
白山寇掠諸郡至盱眙有衆十餘萬世充以兵拒之而
羸師示弱保都梁山為五柵相持不戰後因其懈弛出
兵奮擊大破之

唐薛萬均為上柱國永安郡公與燕王羅藝守幽州竇
建德率衆十萬來至范陽萬均謂藝曰衆寡不敵今若
出鬪百戰百敗當以計取可令羸兵弱馬阻之精騎百
人伏於城側待其半渡而擊之破之必矣從之建德果

引兵渡萬均邀擊大破之

執失思力有戰功封安國公及討遼東留思力統領突厥於夏州之北捍禦延陁其冬延陁率兵十餘萬來寇河南思力示羸弱縱賊深入漸引南行至夏州之境思力整陣擊敗之追奔六百餘里擒延陁耀威磧北而還

冊府元龜卷四百三十三

欽定四庫全書

冊府元龜卷四百三十四 宋 王欽若等撰

將帥部

獻捷

大雅云江漢湯湯武夫洸洸經營四方告成于王周禮曰大司樂王師大獻令奏愷樂若夫奉專征之寄董伏順之師授鉞登壇為萬夫之長班師振旅成七德之功漢魏以還簡策具載則有內承廟筭外震戎容拓土開

疆斬俘獻馘至于剋隣國之勅敵破異俗之餘妖或殲厥叛臣或收其故地所以見帝王之神武宣邦國之威靈傳曰飲至策勳此之謂矣

魯僖公既伐淮夷十三年使武臣獻馘故泮水之詩曰矯

矯虎臣在泮獻馘

晉文公齊師宋師秦師及楚人戰于城濮魯僖公二十八年楚

師敗績七月丙申振旅愷以入于晉愷樂也獻俘授馘飲

至大賞

授數也獻楚俘於廟

漢韓信高祖為漢王時信以左丞相擊魏虜魏王豹定河東請漢王願益兵三萬人北舉燕趙漢王與兵萬人遣張耳與俱進擊趙代信破代擒夏說夏說代相關與邑名與又破趙軍擒趙王歇用廣武君策發使燕燕從風而靡乃遣使報漢因請立張耳王趙以撫其國

趙克國宣帝時為後將軍征諸羗奏言羗本可五萬人軍凡斬首七千六百級降者三萬一千二百人溺河湟饑餓死者五六千人定計遺脫與煎鞏黃羗俱亡者不

過四千人羗靡忘等自詭必得

詭責也自以為憂責言必能得之

請罷

屯兵奏可克國振旅而還

陳湯元帝時為西域副校尉湯與使西域都護騎都尉甘延壽誅郅支單于上疏宜縣橐街事下有司丞相衛御史大夫延壽並奏以為郅支及名王首更歷諸國蠻夷莫不聞知月令春掩骼埋胔之時宜勿縣車騎將軍許嘉右將軍王商以為春秋夾谷之會優施笑君孔子誅之方盛暑首足異門而出宜縣十日廼埋之有詔將軍議是

後漢寇恂字子翼為河內太守光武建武元年更始將
朱鮪聞光武北而河內孤使討難將軍蘇茂副將賈彊
將兵三萬餘人攻恂勒軍擊破之追斬賈彊茂兵投
河死者數千人生獲萬餘人時光武傳聞朱鮪破河內
有頃恂檄至大喜曰吾知寇子翼可任也

耿弇為建威將軍建武五年詔弇討張步步步奔平壽

平壽

縣名屬北海郡
在青州北海縣

乃肉袒負斧鑕於軍門

鑕鎡也
示必死

弇傳步

詣行在所

馬援為伏波將軍建武十七年交趾女子徵側及女弟徵貳反璽書拜援將軍以扶樂侯劉隆為副都督樓船將軍段志等擊之十九年斬徵側徵貳傳首雒陽

魏諸葛誕為鎮東大將軍時吳大將軍孫峻等號十萬至壽春誕拒擊破之斬吳左將

鍾會為鎮西將軍常道鄉公景元四年十一月與征西將軍鄧艾同伐蜀蜀主劉禪詣艾降遣使勅姜維等從東道詣會降會上言曰姜維與張翼廖化董厥等逃死

遁走欲趣成都臣輒遣司馬夏侯威護軍胡烈等徑從
劔閣出新都大渡截其前叅軍爰彰將軍句安等躡其
後叅軍皇甫閭將軍王買等從涪南出衝其腹臣據涪
縣為東西勢援維等所統步騎四五萬人擐甲厲兵塞
川填谷數百里中首尾相繼憑恃其衆方軌而西臣勅
咸聞等令分兵據勢廣張羅網南杜走吳之道西塞成
都之路北絕越逸之徑四面雲集首尾竝進蹊路斷絕
走伏無地臣又手書申喻開示生路羣寇困逼知命窮

數盡解甲投戈面縛委質印綬萬數資器山積昔舜舞
干戚有苗自服牧野之師商旅倒戈有征無戰帝王之
盛業全國為上破國次之全軍為上破軍次之用兵之
令典陛下盛德侔蹤前代翼輔忠明齊軌公旦仁育羣
生義征不諛殊俗向化無思不服師不踰時兵無血刃
萬里同風九州共貫臣輒奉宣詔命導揚恩化復其社
稷安其閭伍舍其賦調弛其征役訓之德禮以移其風
示之軌儀以易其俗百姓欣欣人懷逸豫後來其蘇義

無以過

吳朱然為車騎將軍大帝赤烏九年征桓山魏將李典等聞然深入率步騎六千斷然後道然夜出逆之軍以勝反先是歸義馬茂懷姦覺誅帝深忿之然臨行上疏曰馬茂小子敢負恩養臣今奉天威事蒙克捷欲令所懷震耀遠近方舟塞江使足可觀以解上下之忿惟陛下識臣先言責臣後效帝時抑表不出然既獻捷羣臣上賀帝乃舉酒作樂而出然表曰此家前初有表孤以

為難必令果如其言可謂明於見事也遣使拜然為佐
大司馬右軍師

晉王濬為龍驤將軍武帝太康元年三月濬以舟師平
吳至於建業之石頭孫皓大懼面縛輿櫬降於軍門濬
持節解縛焚櫬送于京都孫皓平振旅

桓豁為右將軍廢帝太和二年擊南陽反人趙會於宛
城走之進獲慕容暉將趙槃送於京師

宋杜慧度為交州刺史輔國將軍高祖永初元年率文

武萬人南討林邑所殺過半前後被抄畧悉得還本林邑乞降輸生口大象金銀古貝等乃釋之遣長史江悠奉獻捷

沈林子領建熙令封資中侯從高祖伐羗參西軍事悉署三府中兵為前鋒與冠軍檀道濟同攻潼關姚泓聞大軍至遣偽康平公姚紹舉關右之衆設重圍守之林子率麾下數百人犯其西北紹衆小靡乘其亂而薄之紹乃大潰俘虜以千數悉獲器械資實時將破賊皆多

其首級而林子獻捷書至每以實聞高祖問其故林子曰夫王者之師本有征無戰豈可復增張虜獲以自誇誕

梁曹景宗為右衛將軍武帝天監五年魏軍攻徐州詔景宗攻破之生擒五萬餘人收其軍糧器械積如山岳牛馬驢騾不可勝計景宗乃搜軍所得生口萬餘人馬千匹遣獻捷

蘭欽為左衛將軍欽南征夷獠擒陳文徹所獲不可勝

計獻大銅鼓累代所無

陳侯瑱為司空高祖永定二年二月壬午督衆軍自江入合肥焚齊舟艦三月丙申至自合肥衆軍獻捷

後魏安頡為冠軍將軍太武神麴四年宋將檀道濟王德東走諸將追之至歷城而還頡獻宋俘萬餘人甲兵三萬波權喜為征西將軍孝文太和元年十月宋葭蘆戍主楊文度遣弟竄襲陷仇池十二月權喜攻陷葭蘆斬文度傳首京師

傅永為豫州王肅建武將軍平南長史太和中南齊將
裴叔業率王茂先李定等來侵楚王戍永適還州肅令
永討之獲叔業傘扇鼓幕甲仗萬餘兩月之中遂再獻
捷孝文嘉之

党法宗為揚州小峴戍主宣武景明三年法宗襲南齊
大峴戍破之擒其龍驤將軍邾菩薩送之京師

爾朱榮為河北都督畿內諸軍事孝莊建義元年十月
榮破葛榮檻送於京師帝臨闔闔門榮稽顙謝罪斬於

都市

費穆為大都督建義元年十月大破梁軍擒其將曹義
宗檻送京師

上黨王天穆為大將軍以永安元年四月大破邢杲於
齊州之濟南杲降送京師斬於東市

北齊彭樂為都督從神武西征樂使告捷虜西魏臨洮
王東蜀郡王榮宋江夏王升鉅鹿王闡譙郡王亮詹事
趙善督將僚佐四十八人皆係頸反接手臨以及歷兩

陣而唱名焉

唐李勣為右武侯大將軍高祖武德四年統河南山東之兵以拒王世充及從太宗平竇建德降世充振旅而還論功行賞太宗為上將李勣為下將勣與太宗俱服金甲乘戎輅告捷於太廟又從太宗破劉黑闥徐圓朗累遷左監門大將軍圓朗重據兗州反授勣河南大總管以討之尋獲圓朗斬首以獻高宗總章元年命勣為遼東道行軍總管虜高麗王藏及男建男產

裂其諸城竝為州縣振旅而還令勣便道以高藏及男
建獻於昭陵禮畢備軍容入京城獻太廟總章元年十
二月以高麗平獻俘於含元殿大會勣及部將以下大
陳設於庭

侯君集為交河道行軍大總管討高昌王麴智盛獻捷于觀德殿
四年十二月旋師執高昌王麴智盛獻捷于觀德殿

阿史那社尒為崑丘道行軍大總管征龜茲太宗貞觀
二十三年執龜茲王訶利布失畢及其相那利等獻於

社廟

高俛為左翊衛郎將高宗永徽元年九月執突厥車鼻可汗獻太廟

蘇定方為行軍大總管征賀魯高宗顯慶三年十一月定方俘賀魯到京師帝謂侍臣曰賀魯背恩今欲先獻俘於昭陵可乎許敬宗對曰古者出而凱還則飲至策勳於廟若諸侯以王命討不庭亦獻俘於天子近代征伐克捷亦用斯禮未聞獻俘于陵所也伏以園寢嚴敬

義同清廟陛下孝思所發在禮無違亦可行也十五日
還獻於昭陵十七日告於大社皇帝臨軒大會文武百
僚夷狄君長定方戎服操賀魯獻于樂懸之北帝責之
不能對攝刑部尚書長孫冲跪於階下奏曰伊麗道獻
俘賀魯請付所司大理官屬受之以出詔免其死五年
定方為左驍騎大將軍討思結闕侯斤都曼獻俘于東
都帝御乾陽殿定方操都曼等以獻法司請斬之定方
請曰都曼反叛罪合誅夷臣欲生致闕庭與之有約述

陛下好生之德必當待以不死今既面縛待罪臣望與其餘命帝曰朕屈法申恩全卿信誓乃令宥之定方從幸太原制授熊津道行軍大總管討百濟賊師敗績定方等將士引百濟王扶餘義慈太子隆小王孝演孫文思及偽將五十八人皆操右袂抑首以獻竝釋放之

裴行儉為定襄道大總管高宗永隆二年十月行儉等獻定襄所獲突厥俘囚阿史那伏念及溫傳等五十四人斬於都市

初行儉討伏念待以不死侍中裴夷筮其功乃奏曰伏念為副將程務琕逼逐窮急

而降帝乃命斬于都市封行儉為聞喜縣公行儉嘆曰
渾漉前事古今耻之但恐殺降之後無復來者因稱疾
出不

建安王攸宜為清邊道大總管則天萬歲通天二年七
月攸宜平契丹凱旋詣闕獻俘

李楷固為左玉鈐衛將軍則天久視元年楷固及右武
威衛將軍駱務整討契丹餘衆擒之獻俘於含樞殿則
天大悅

冀良琛為忠萬州討擊使睿宗景雲二年良琛獻俘山

賊悉平

郭知運為隴右節度使玄宗開元五年知運大破吐蕃虜獲囚獻於闕下帝悉免而撫之分配諸州為編戶語郭知運及諸將曰吐蕃孤恩負約忘義卿等受委逆挫羣克焚溺之餘俘獲仍衆覽今獻捷深用嘉焉

王君奭為隴右節度使鄯州都督開元十二年君奭破吐蕃來獻戎捷帝置酒于內殿享之謂曰卿能振國威恢邊破敵誠節既著俘獲又多疇庸策勲已有策命卿

及將士等竝宜飲至兼有賜物各宜領取

張守珪為幽州節度副大使開元二十二年守珪大破

林胡遣使獻捷擇日告廟二十八年八月二十日勅幽

州節度奏破奚契丹宜擇日告廟

自後諸軍每有
克捷必先告廟

蓋嘉運為磧西節度使開元二十八年嘉運俘吐火先
可汗來獻帝特捨之授以官爵

皇甫惟明為隴右節度使玄宗天寶五載五月己巳惟
明以所獲吐蕃突厥俘來獻太廟

哥舒翰為隴右節度使天寶八載翰收隴右石堡城獻
功于朝帝御丹鳳樓會羣臣下制褒獎

高仙芝為西安四鎮節度天寶十載仙芝生擒突騎施
可汗吐蕃大首領及右國王并可敦及羯帥來獻帝御
勤政樓會羣臣引見

楊國忠為劔南節度使天寶十一載國忠破吐蕃數十
萬衆於雲南獻俘於廟表曰臣國忠言頃以南蠻閣羅
鳳敢背皇恩吐蕃與其潛謀欲於瀘南結聚窺窬越雋

草竊昆明繇是西山諸部及八國子弟知其狡詐同請
討除臣當戎行祇奉睿略破吐蕃雲南救兵六十餘萬
屠拔隰州等三所大城擒俘虜六千三百臣以劔山迢
遞不可盡來遂簡丁壯千餘并投降首領昨日於勤
政樓奉獻已降殊恩臣又以男女口二百人六日於躍
龍門進納陛下以生成之德不限華夷詔臣曰夫王者
之義子育為先每行千紀之誅嘗軫在予之念吐蕃遺
孽頻有負恩其君則然其人何罪且全其生理遂彼物

情其所獻口并宜釋放遞還本國以直報怨於是乎在
微臣於是何幸親奉德音聞所未聞以忻以感伏惟陛
下含弘庶品康濟羣生大敷恩信下格昏迷自皇王以
來未有如今日者也天下幸甚豈惟諸戎特望宣付史
官頒示中外許之

安祿山為范陽節度使天寶十四載祿山奏破奚五千
騎并破契丹勃朱蜀活等部落賊等除戮之外應獲生
口駝馬牛羊甲仗共一百三十二萬

段子璋為越雋太守肅宗至德二年三月太上皇在蜀郡段子璋俘所獲吐蕃生口來獻詰責而捨之

萬敵為南陽都知兵馬使至德二年八月破賊馬軍二千人步軍二萬餘人與興平軍使李益斬賊括簡使十數人傳首至鳳翔府

郭子儀肅宗時為朔方節度使乾元元年十月子儀告捷收新鄉縣獲萬餘人馬六千餘匹進圍衛州十一月壬申兵部尚書王思禮奏相州城下破賊二萬人兼獲

旗幟器械二年二月丁未朔子儀破逆賊執其將軍車
昂獻俘於朝徇於東西兩市而斬之七月子儀擒逆賊
將安太清送闕下子儀至代宗朝為關東副元帥大歷
三年九月子儀率兵五萬自河東移鎮奉天戊戌子儀
靈州破吐蕃六萬餘衆文武百僚入賀于紫宸殿京師
解嚴十月丁卯子儀至自奉天行營八年十月子儀奏
大破吐蕃十萬餘衆己巳文武百官入賀于紫宸殿庭
衛伯玉為鎮西行營節度使乾元三年正月伯玉獻俘

百餘人至闕下有詔解縛而赦之

李光弼為朔方副元帥乾元三年四月奏三月二十九日懷州城下破逆賊安太清馬步四千餘人今月二日又于河陽西渚東灘破逆賊史思明兵馬三千餘人前後斬一千五百餘級生擒逆賊姪女婿偽衛前兵馬使李秦璧及偽驃騎大將軍特進已下七十餘人

田神功為平盧節度都知兵馬使上元元年六月神功奏鄭州城下破賊四千餘衆生擒逆賊大將四人牛馬

驢及器械不可勝數二年二月神功生擒逆賊劉展來
獻

王仲鼎為淮西申蘄黃沔等州節度使兼知鄭汴等一
十三州節度都勾當處置使上元元年九月仲鼎奏破
逆賊史思明下將思庭金二萬餘衆斬首二萬餘級獲
賊器械二千餘事元年建丑月仲鼎奏建子月十三日
曹州刺史常休明破逆賊偽將軍薛萼史盡忠李建盧
等馬步三萬餘衆獲器械二萬餘事

熊元皓為兗州刺史上元元年十二月秦破兗鄆史思明下逆賊二千人

魚朝恩為陝州觀軍容使元年建丑月秦神策軍節度兵馬建子月六日平逆賊永寧縣鹿脊岡城及破澠池福昌長水等縣一萬餘衆生擒二千餘人斬首三千餘級獲馬畜器械共五萬已上

來瑱為山南節度使鄧州刺史元年建丑月瑱奏斬汝州逆賊五千餘衆牛馬驢并器械等不可勝數

成公意為鄜州刺史秦破勾扇党項賊斬獲偽勅使驛
騎將軍都督石金德等共三千餘衆斬首六百餘級兼
獲偽勅文牒并器械衣裝雜物等共三千餘事牛羊雜
畜甚衆又檢校鄜州兵馬使內給事林明俊奏破党項
一千餘衆斬首四百餘級并驢駝馬器械甚衆

僕固懷恩代宗初為朔方節度使懷恩上言幽州平河
北州縣盡平史朝義為亂兵所戮傳首上都

馬璘為邠寧節度使代宗大歷三年八月吐蕃大將尚

贊摩寇牢州璘破二萬餘衆擒其俘以獻之

李勉大歷十一年為汴宋節度使未行汴州將李靈曜阻兵北結田承嗣使姪悅將銳兵戍之詔勉與李忠臣馬燧等攻討大破之悅僅以身免靈曜北走騎將杜如江擒之勉以獻代宗褒賞甚厚

鮮于叔明大歷十一年為劔南西川節度使奏吐蕃寇黎雅兩州大破之會南蠻閣羅鳳來援于望漢城生擒吐蕃大龍官論噐然獻于闕下

王武俊為成德軍節度兵馬使德宗建中三年閏正月
武俊殺賊李惟岳傳首京師

輔良交為安南都護建中三年七月良交斬李孟秋等
絳人傳首來獻孟秋為演州司馬與絳州刺史李被岸
等舉兵叛自稱安南節度使良交攻殺之

哥舒曜為汝州節度使建中四年三月曜收復汝州生
擒李希烈偽署刺史周冕以獻斬其將楊謹欽張文江
傳首京師

李晟為神策軍使德宗興元元年五月德宗在梁州賊
朱泚為晟等所敗走涇州晟遣衛前將兼御史大夫張
少烈上收京師露布至百僚稱賀帝覽之感泣百官皆
出涕因上壽稱萬歲曰晟虔奉聖謨盪滌克慝雖古之
樹勲力復都邑者往往有之至於不驚宗廟不易市肆
長安人不識旗鼓安堵如初三代已來未之有也帝笑
曰天生李晟為社稷萬人不為朕也百官再拜而退甲
辰幽州將健韓旻梁庭芳朱惟禮等於寧州彭原縣西

斬逆賊朱泚傳首來獻

劉洽為宋亳節度興元元年十一月洽與曲環并淄青將李欽瑤大破李希烈軍於陳州城下殺獲逆衆三萬五千人擒其大將翟崇揮以獻命斬於皇城西南隅戊午洽復大破賊收復汴州希烈奔蔡州擒其偽署將相鄭贄劉敬宗張伯元呂子岳李達于以獻

牛名俊為朔方部將德宗貞元元年八月名俊斬李懷光自降於馬燧河中傳懷光首以獻

韓全義為夏州節度貞元十四年全義上言破吐蕃衆
於鹽州西北

韋臯為劔南西川節度十七年九月上言大破吐蕃于
雅州是月臯復上言破吐蕃于雅州

嚴礪為山南西道節度使憲宗元和元年九月奏破劉
闢賊兵二千人於神后縣生擒蠻將牛文悅十月戊子
西川行營神策軍使高崇文檻送逆賊劉闢至京西臨
高驛左右神策兵士迎之以帛繫首及手足曳而入帝

御安興樓受俘馘令中使于樓下詰闢反狀闢曰臣不敢反五院子弟為惡臣不能制又遣詰之曰朕遣中使送旌節官誥何故不受闢乃伏罪令獻太廟郊社徇于市即日戮于子城西南隅

趙昌為嶺南節度使元和二年四月昌進瓊竿儋振萬安五州三十二洞歸降圖是日宰臣表賀請付史官從之

張子良為潤州大將元和二年節度李錡反子良及李

奉仙白少卿裴行立等生擒錡至闕下帝御興安門親
詰其反狀錡曰臣本不反張子良教臣帝曰汝以宗臣
為統帥子良為惡何不斬之而後入錡不能對命獻太
清宮太廟太社即與其男師回竝腰斬於子城之西南

隅

劉濟鎮幽州節度元和五年正月討鎮州王承宗濟奏
下饒陽縣并獻虜獲六月又奏收安平縣

李光顏為忠武軍節度使元和十一年正月奏連敗淮

西吳元濟之衆憲宗大悅賜告捷使婢奴銀錦

郝士美為昭義軍節度使元和十一年二月以進討鎮
州王承宗所獲賊首三百來獻詔梟於通化門外二日
田弘正為魏博節度元和十一年七月弘正奏破鎮州
賊于南宮縣殺二千餘人六月又奏淄青兵馬攻棣州
磁石鎮當軍與賊交戰殺獲六百餘人十四年二月壬
戌奏今月九日淄青節度都知兵馬使劉悟斬逆賊李
師道并男二人淄青兗鄆等十二州平甲子御宣政殿

受賀已巳田弘正遣使獻逆賊李師道之首命左右軍
兵衛之先獻于太廟郊社帝御興安門百僚于樓下列
位稱賀

李愬為唐鄧節度使元和十二年十月愬奏以九月二
十六日圍蔡州吳房縣攻其城毀之斬首千餘級十月
丁卯愬帥師入蔡州執賊帥吳元濟以聞淮西平辛巳
御宣政殿受朝賀九品已上及宗子四夷之使皆會乙
酉詔曰吳元濟豺狼醜類敢悖天常不知覆露之恩輒

肆猖狂之計拒捍成命焚劫鄰封誑誤我平人殘傷我赤子縣邑黎庶號呼屢聞朕為人父母豈得不興愧亦嘗告諭曾靡悛心稔慝延災日滋月甚所以命貔貅之旅致原野之誅雷霆所當巢穴盡覆獲此兇豎正其刑書與衆棄之茲為國典宜准法處斬其餘支黨竝從別勅處分十一月丙戌朔御興安門文武百官分序街之左右六軍備衛詔以吳元濟獻于太廟太社畢徇東西市斬于城西南隅

桂仲武為安南都護元和十五年六月奏三月二十九日收尅安南賊黨楊清等處置訖八月甲戌仲武送逆將楊清首至長樂驛命中使就瘞之十二月癸未容州奏破黃洞賊萬餘衆收營柵三十六穆宗長慶元年正月戊午容州上言破黃家賊二十人

李進誠為靈武節度使穆宗長慶元年二月奏於太石山下破吐蕃三千騎殺戮二百六十七人馳馬牛羊衣甲稱是

王智興鎮徐州長慶二年正月智興獲李師道男明安獻之文宗太和二年三月智興奏于棣州界破賊五百餘人燒却棣州三面城門九月智興奏于黃河北陽信縣破滄州賊收得鹽船五隻鹽三萬石智興奏剋棣州入州城收城內兵馬三千四百人百姓一萬五百人僧共一百二十人州縣官六員官典九人印一十二面錢物六百九萬件疋米粟等一萬一千石衣甲器械一十七萬事牛驢馬共一百九十頭芻草四萬五千束庚寅

宰臣以破賊率百僚於閣內稱賀又對宰臣等於延英
殿十一月丁巳智興奏羗兵馬使李君謀領兵五百人
過河深入賊界夜破賊無棣縣殺戮一千五百五十人
進所收棣州倉庫印一十二面銅牌六面

烏重胤為鄆州節度文宗太和元年九月奏破滄州李
同捷賊衆二千餘人十月壬辰又奏破賊三千餘人斬
首五百人

李載義為幽州節度太和元年十月奏破滄州賊六千

人戮殺一千五百人生擒一百五十人即時名其奏事
官對于麟德殿賜錦綵銀器二年十月壬午又奏於長
蘆縣破賊二萬生擒四百三十人三年正月又奏攻破
滄州長蘆縣殺賊五千餘人生擒七百五十五人內二
百八十五人是鎮州賊其縣已差兵固守二月奏于木
刀溝南鎮破賊二萬人圖一軸

康志睦為淄青節度使太和元年十一月志睦奏破滄
州賊兵千餘人獲賊糧鹽船一十五隻

史憲誠為魏博節度使太和二年七月憲誠上言大破
滄州賊于平原縣北殺戮一千餘人生擒大將三十二
人八月奏于棣州平原縣北破滄州賊二萬餘人殺戮
三千餘人九月奏於長河縣破賊柵一所十月奏於平
原縣破滄州賊一萬三千餘人殺戮三千五百人又奏
于平原縣北破賊二萬餘人又奏收德州平原縣

柳公濟為易定節度使太和二年八月壬戌公濟于新樂
縣界破鎮州王廷湊賊衆二萬人殺戮三千人宰臣奏

表陳賀九月公濟又奏於鎮州博野縣破賊四千五百餘人燒除却村柵一十五所十月壬午公濟奏於行唐縣破賊三千餘人十一月公濟奏云十月二十日自領兵士下賊堅固砦又於砦東與賊交戰大破賊衆五萬餘人殺戮三萬人

劉從諫為昭義軍節度使太和二年八月乙卯從諫奏於臨城縣破鎮州賊二千餘人癸未奏於趙州昭慶縣南破鎮州賊二千餘人殺戮一千餘人

李祐鎮滄州太和三年祐自領兵馬及行營諸軍再收
德州平原縣破賊三千餘人即時召宰相入中書命中
使以捷宣告三月又奏破滄州賊二萬人殺戮三千人
四月庚戌又連破二萬餘人殺戮一千五百人丙子又
奏破德州城內將卒三千餘人走投鎮州又奏得李
同捷書求降并以書上聞五月己卯朔宰相稱賀於紫
宸殿下德州故也又奏李同捷母阿孫妻阿崔男元達
并差人押送上都

崔弘禮為鄆州節度使太和三年五月庚辰弘禮奏宣慰使栢耆領當道及幽州兵馬入滄州當時取得李同捷出滄州訖丙戌滄州遞進宣慰使栢耆表二封并露布一卷丁亥左右軍各出馬步七百五十人起長樂驛防押李同捷首至興安樓前立仗宰相率百僚敍立於樓前同捷自違命及就誅勞問罪之師凡三歲焉

李德裕為劍南西川節度使太和五年九月德裕上言收復吐蕃先陷維州城使差兵馬鎮守

呂義忠為河東監軍武宗會昌四年二月義忠擒太原
叛將楊弁及兄弟同謀大將等五十四人獻于闕下皆
斬之

郭誼為澤潞大將會昌四年八月辛巳朔殺逆賊劉禎
傳首京師帝御興安門獻于宗廟社稷百官樓前稱賀
高駢為南都護軍懿宗咸通七年九月駢上奏收復交
州盡平蠻賊積歲所侵故地是日帝受百僚賀

楊復光為天下兵馬都監僖宗中和二年復光進收復

京國表曰頃者妖興霧市嘯聚叢祠而岳牧藩侯備盜不謹謂大同之運嘗可容奸謂無事之秋縱其長惡賊首黃巢因得充盈窟穴蔓延萑蒲驅我蒸黎徇其凶逆展鋤鶴以成鋒必殺耕牛以恣燔炮魃魅晝行虺蜴夜噬自南海失守湖外喪師養虎災深馴梟逆大物無不害惡靡不為豺狼貽朝市之憂瘡痍及腹心之痛遂至流毒百姓盜污兩京衣冠啣塗炭之悲郡邑起丘墟之嘆萬方共怒十道齊攻仗九廟之威靈殄積年之凶醜

河中節度使王重榮神資壯烈天付機謀誓立功名志
安家國至於屯田待敵率士當衝收百姓十餘萬家降
賊黨三萬餘衆法能持重功遂晚成久稽原野之刑未
快雷霆之怒自收同華逼近京師夕烽高照於國門游
騎頻臨於灞岸既知四隅斷絕百計奔衝如窮鳥觸籠
似飛蟲赴燭鴈門節度使李諱神傳將畧天付忠貞機
謀與武藝皆優臣節其本心相稱殺賊無非手办入陣
率以身先可謂雄才得名飛將自統本軍南下與臣同

力前驅雖在寢殮不忘冠孽今月八日遣衙隊前鋒楊
守宗河中騎將白志遷橫野軍使滿存躡雲都將丁行
存朝邑鎮將康師貞忠武黃頭軍使龐從等三十都隨
李諱自光泰門先入京師力推兇寇又遣河中將劉讓
王瓌龔君武孫珙忠武將喬從遇鄭滑將韓從威荆南
將軍屠棕滄州將賈滔易定將張仲慶壽州將張行方
天德將顧彥朗左神策弩手甄君楚公孫勝左橫衝軍
使楊守亮躡雲都將高周彝忠順都將胡真絳州監軍

毛宣伯聶弘裕等七十都繼進賊尚為堅陣來抗官軍
鴈門李諱率勵驍雄整齊金革叫噪而聲將動瓦喑鳴
而氣欲吞砂寬列戈矛密張羅網於是麾軍背擊八騎
橫衝日明而劍耀飛輪風急而旗開走電使賊如浪便
可塞流使賊如山亦須折角蹂踐則橫屍入地奔騰則
積血成川楊守宗等齊驅直入合勢夾攻從卯至申羣
兇大潰自望春宮前蹙殺至昇陽殿下攻圍戈不濫揮
矢無虛發其賊一時奔遁南入商山徒延漏卮之生佇

作飲頭之器伏自收平京闕三面皆立大功若破敵推
兇鴈門實居其首其餘將佐同效驅馳兼臣所部二萬
餘人數歲櫛風沐雨既茲平盪竝錄以聞

李承嗣為河東軍校中和二年承嗣為前鋒討黃巢於
華陰黃巢令偽客省使王汗會軍機於黃揆承嗣擒之
以獻

時溥為徐州節度使中和三年七月溥進表行在獻黃
巢首級於行廟受百僚賀

其年五月溥遣將張友與尚讓之眾掩捕之至狼虎谷巢

將林言斬巢及二弟鄴揆等
七人首級并妻子送徐州

王重榮鎮河中光啓二年僖宗幸興元邠州節度使朱
玫立嗣襄王煜於京城十二月敗奔河中為重榮斬首
以獻帝御輿元城南門閱俘受賀時太常博士殷盈孫
獻議曰伏以為煜違背宗社僭竊乘輿已就誅夷所宜
慶賀然物議之間或有未允臣按禮經公族有罪獄既
具有司聞於君曰某之罪在大辟君曰赦之如是者三
有司走出致刑君復使謂之曰雖然固當赦之有司曰

不及矣君為之素服不舉樂三日今偽煜皇族也雖犯
誅死之罪宜就屠戮其可以朝羣臣而賀乎臣以為煜
迫脅之際不能守節効死而乃甘心逆謀宜黜為庶人
絕其屬籍其首級仍委所在以庶人禮葬其大捷之慶
當以朱玫首級到日稱賀從之

李璠為汴州行軍司馬昭宗龍紀元年二月璠檻送賊
秦宗權并妻趙氏以獻帝御延喜門受俘百僚稱賀以
之狗市告廟社斬于獨柳趙笞死

宗權初為蔡州節度
中和三年巢賊走關

東宗權遂戰不利因與合從為盜巢賊既誅宗權復僭稱帝號

後唐閻鏐武皇牙將也武皇初為河東節度使昭宗乾寧二年武皇討邠州王行瑜行瑜急困與其妻子部曲五百餘人潰圍出奔至慶州為部下所殺其家二百口并詣行營乞降武皇命鏐獻於京師十二月甲申朔昭宗御延喜門受俘馘百僚樓前稱賀

冊府元龜卷四百三十四

欽定四庫全書

冊府元龜卷四百三十五 宋 王欽若等 撰

將帥部

獻捷第二

梁太祖開平元年五月湖南節度使馬殷奏克袁州大破淮寇畫圖以進宣示宰臣先是淮夷襲陷洪州并有宜春袁民厭淮夷苛政且忿其屠戮而征賦煩重乃有邊界酋首潛以人情利害導湖南之兵取袁州淮夷賊

寇失守舉郡皆沒殺傷甚衆馬殷屯兵戍守以捷來奏
二年五月癸未朗州奪得淮賊舟船大小共四十隻斬
首百餘級以捷來告

九月同州劉知俊以郿延歸降將健十人并捷表來獻
十月己亥朔帝在陝兩浙節度使錢鏐奏於常州東洲
鎮殺淮賊萬餘人生擒將校千餘人獲戰船一百二十
隻

三年六月戊戌兩浙節度使錢鏐奏四月十六日於蘇

州大破淮賊擒獲數千人戰船數百隻噐甲二十餘萬
是月丁未靈武節度使韓遜奏收復鹽州擒偽刺史李
繼直以下六十二人竝處斬訖七月殿直聶榮受自軍

前走馬奏收復丹州生擒賊將王行思獻于行在

時同州節

度使劉知俊叛

八月辛酉城州刺史張敬方既定其郡又移兵尅房陵
九月庚子殿直王唐福自襄州走馬以天軍勝捷逆將
李洪歸降事上聞賜唐福絹銀有加宰臣百官上表稱

賀壬寅開封府虞候李繼業齋襄州都指揮使程暉奏
狀以今月五日殺戮逆黨千人并生擒都指揮使傅霸
已下節級共五百人收復襄州人戶歸業事癸卯帝御
文明殿以收復襄漢受宰臣已下稱賀四年四月葉縣
鎮遏使馮德武於蔡州西平縣界殺戮山賊擒首領張
濟等七人以獻

乾化元年十一月庚寅延州節度使高萬興奏當軍都
指揮使高萬金統領兵士今月五日收鹽州偽刺史高

行存泥首來降丞相及文武百官各上表稱賀按鹽州
與吐蕃党項封境互接為二境咽喉之地又有烏池鹽
鹺之利唐建中初為吐蕃所陷平其墉而去繇是銀夏
寧延洎于靈武歲以河南河東山東淮南青徐江浙等
道兵士不啻四五萬分護其地謂之防秋貞元九年朝
政稍暇乃命副元帥渾瑊總兵三萬復取其地建城壁
焉自是虜塵乃清邊患遂止唐末又復失之今纔動偏
師遽收襟要國之疾疢其息哉

十二月延州節度使高萬行奏領軍於邠州界蒿子谷
韋家寨殺戮寧慶兩州賊軍約二千餘人并生擒都頭
指揮使及奪馬器甲等事其人奏軍將使宣召赴內殿
畧對詔以銀器絲物錫之宰臣及文武官各奉表賀

是月魏博節度上言於涇縣北戮殺鎮州王鎔兵士七
千餘人奪馬二千餘匹戈甲未知其數并擒都將已下
四十餘人

後唐莊宗天祐十四年以契丹攻周德威於幽州命諸

將進討八月大軍入幽州翌日獻捷于鄴

十八年九月北面招討使李存審攻鎮州下之擒王德明之子處球同惡高蒙李翥露布以獻

同光二年五月潞州招討霍彥威平潞州擒叛將楊立獻捷以聞

是年龍武大將軍夏魯竒擒梁將王彥章以獻帝壯之賞絹一千疋

三年二月荆南高季興奏收復歸夔忠等州

四年三月李紹真奏收復邢州擒賊首趙太等二十一

人徇於鄴都城下皆磔於軍門是月西面行營副招討

使任圜奏收復漢州擒逆賊康延孝

時圜從郭崇韜平蜀延孝以利州叛

欲廻劫西川圍率兵攻延孝於漢州擒之

明宗天成二年九月以峽路招討西方鄴進兵殺敗荆

南賊船收復忠萬夔等州圖一面陳於通天門外俾將

校觀之

三年四月復州刺史周令武飛狀上言湖南大軍魯與

淮南賊將王茂求等戰於道人磯茂求敗績

五月癸丑湖南馬殷上言今歲二月中殺敗淮寇二萬
衆生擒將卒五百餘人內外皆賀是月壬申破定州曲

陽捷音至帝大悅謂侍臣曰王都違負天地擒之不遠

因此蕪破契丹也左右稱賀

王都為定州節度使通契丹為叛

六月己丑張延朗自定州迴押領到所獲賊將五十餘
人帝御咸安門觀其獻俘

七月己丑北面招討使定州刺史王晏球獻所獲戎馬

一百匹甲子晏球使人馳報十九日契丹七千騎來援定州遂逆戰於唐河北敗之襲至蒲城又掩殺二千級捉馬千匹內外稱賀已巳驛騎入報二十一日又於陽州掩殺契丹四十餘里擒獲殆盡

八月鎮州趙德鈞馳騎上言今月二日於府西逢契丹敗黨數千生擒首領惕隱等五十餘人接殺皆盡契丹強盛僅三十年雄據北戎諸蕃竄伏屢為邊患漢兵嘗憚之前後戰爭罕得其利是役也曲陽之敗已失千騎

唐河之陣兵號七千潰散之後溝渠泛溢官軍襲殺人
不暇食秋雨繼降泥濘莫進人饑馬乏難投村落所在
村人持白梃毆之德鈞生兵接於要路惟竒峯嶺北有
棄馬潛遁脫者數十餘無噍類帝致書諭其本國皇威
大振四年正月房知溫攻帥子口白波砮獻捷於行闕
二月乙巳北面馳報是月三日收復定州帝大悅舉酒
徧賜侍臣喜除心腹之疾賜教坊絹五百疋內臣進馬
稱賀丙午百辟入賀戊申宴群臣於玉華殿樂作王晏

球馳報已獲王都首級生擒契丹禿餒等二千餘人宴
罷賜物加等辛酉定州獻俘馘帝御咸安樓立儀仗百
官就列尚書兵部宣露布於樓前曰蓋聞禍福兩途響
應雖從於天道賞罰二柄憲章必在於帝王所以虞
殛四凶之徒周誅三監之類為時除害令在必行顯申
旄鉞之威以勦豺狼之黨逆賊王都濫承餘緒叨據邊
方當朝廷念舊之時冒藩翰延賞之帥曾無績効但抱
姦邪國家光有萬邦寵綏諸夏累頒殊渥官兼右相之

榮疊示優恩秩冠三公之貴諒茲睠命果至滿盈况
去歲駐驛夷門弔民梁苑萬乘有省方之念諸侯專述
職之勤而王都乃背惠辜恩藏姦積釁不思入覲惟自
偷安以至繼歷寒暄逗留川陸朝廷務從寬恕累降詔
書候其悛心冀全理體殊不知克頑益固抗拒彌堅信
折簡以難招非舞干而可格而又朋連北狄狎禦王師
擾我疆場負我盟誓須茲飾怒所冀夷克乃謀帥於軍
中俾恭行於天罰繇是貔貅雲集虎豹風馳咸搗梟巢

誓平蟻穴北面招討天平軍節度使王晏球等推心許國挺志忘家皆矜摩壘之雄各騁寢皮之勇遂乃交飛矢石齊舞梯衝共指遊鼎之魚必取膏礎之肉以致徵兵調食結壘連營踰沙軼漠之戎全軍皆戮同惡齊姦之虜匹馬不迴而又舉螳臂以求生張蝟毛而自固計窮力盡且無飛走之門萬詐千妖寧免芟夷之禍是以致其醜類無所逃形既諧飲至之期爰契疇庸之典今月三日定州指揮使馬讓能已下三人先約歸降是時

果於賊城之上自相殺戮王晏球等領兵士直扣曲陽
門接勢而攻一合收下其逆賊王都及禿餒趨入子城
斬首生擒不可勝計至於徒黨骨肉略無孑遺今則獻
俘行闕懸首藁街六師盡敵而凱旋一境復安於生聚
王晏球等已下從上行賞表不踰時或跨鎮分封官居
極品或雙旌大旆寵寄十連著銘鐘鏤鼎之榮顯傳子
示孫之業於戲違天逆道鬼瞰神誅顧斯盪定之勲實
快華夷之意可期康樂以泰黎元申號令於市朝明征

伐之有謂布告天下咸使聞知刑部侍郎張文寶奏曰
逆賊王都首級請付所司大理卿蕭希甫受之以出獻
於郊社畢於街市號令王都男四人弟一人秃餒父子
二人竝磔於開府橋文武百官稱賀於樓前

長興元年三月靈武節度使康福奏攻取保靜鎮賊首
李正賓并其黨與盡誅之

是年河中軍校楊彥溫逐其帥皇子重瑋四月河中行
營都部署索自通奏今月十八日收復河中斬楊彥溫

傳首來獻帝御殿受賀

壬戌冀州奏殺敗蕃賊於城中見輿棺者訊其降者云
威城之戰上將金頭王中流矢而死此其櫬也

八月太原節度使秦代州刺史白文琦破契丹於七里
峰斬首千餘級生擒將校七千餘人

二年二月符州防禦使折從阮奏部領兵士攻圍契丹
勝州降之見進兵趨朔州

三月易州刺史安審約奏二月三日夜差壯丁斫虜營

殺賊千餘人又奏郎山砦將孫方簡破契丹千餘人斬蕃將諧里相公虜其妻以獻又杜重威以大軍攻秦州刺史晉廷謙以州降獲守城兵士三百八十九人朝廷稱賀又奏收復蒲城獲契丹首領沒刺相公及守城兵士一千九百六十四人又奏收復遂城縣守城契丹留六十三人首領餘竝殺之四月內班張嶼北面軍前廻進呈收奪得契丹王金孟子龍鳳旗李守貞又進奪得契丹王奚車白駝掌羽旗槍等護聖散都頭辛進進納

奪得契丹王紅羅威金銀線裝玉鞍轡一副賜絹五十疋蓋盃一口

三年八月李守貞奏大軍至望都縣相次至長城北遇虜寇千餘騎轉鬪四十里斬蕃將解里相公

是月靈武馮鐸奏與威州刺史藥元福於威州土橋西一百里遇吐蕃七千餘人大破之斬首千餘級張彥澤奏破蕃賊於定州界斬虜首二千餘級追襲百餘里生擒蕃將四人摘得金耳環二副進呈癸卯太原奏破契

丹於陽武谷殺七千餘人

漢隱帝乾祐元年二月右衛大將軍王景崇奏於大散關大敗蜀軍俘斬三千人初北虜犯京師侯益趙贊皆受虜命節制岐蒲聞高祖入雒頗懷反仄朝廷移贊於京兆益與贊皆求援於蜀蜀遣何建率軍出大散關以應之至是景崇糾合岐雍邠涇之師以破之又遣人送所獲偽蜀將校軍士四百三十八人至關下詔釋之仍各賜衣服

九月鳳翔都部署趙暉奏大破川軍於大散關殺三千餘人其餘棄甲而遁

是月永興行營都部署郭從義奏今月十四日鳳翔王景崇兵士離本城尋遣監軍李彥從率兵追襲至法門寺西殺戮二千餘人趙暉又奏破王景崇賊軍於鳳翔城下

二年正月河中府軍前奏今月四日夜賊軍偷斫入西寨捕斬七百餘級時蜀軍自大散關來援王景崇周太

祖自將兵赴岐下將行戒白文琦劉詞等曰賊之驍勇
竝在城西慎為做備既行至華州聞川軍敗退且憂文
琦等為賊奔突遂兼程而廻賊內俱知周太祖西行夜
遣賊將王三鐵等率驍勇十餘人沿流南行坎岸而登
為三道來攻賊軍已入王師砦中劉詞極力拒之短兵
既接遽敗之

三月徐州巡簡使成德欽奏至峒崕鎮遇淮賊破之殺
五百人生擒一百二十人

五月湖南秦蠻寇賀州遣大將徐進率兵援之戰於鳳陽山下大敗蠻獠斬首五千級

七月永興都部署郭從義奏新除華州留後趙思綰三月三日授華州留後准詔赴任三移行期仍要鎧甲以給牙兵及與之竟不遵路至九日適有部曲曹彥進告思綰欲於十一日夜與同惡五百人奔南山入蜀是日詰旦再促上路云候夜進塗臣等與王峻入城分兵守四門其趙思綰部下軍各已執帶遂至牙署令召思綰

至則執之與一行徒黨竝處置訖

是月西面行營都部署露布獻河中府所獲逆賊李守貞首級并俘馘等帝明德門樓受俘群臣列班於位稱賀而退

三年春正月鳳翔行營都部署趙暉奏前月二十四日收鳳翔逆賊王景崇舉家自燔而死請供奉官張銖押逆賊王景崇首級并同惡周瓌至闕下獻俘馘命狗於六街磔於兩市

周太祖廣順元年二月隰州刺史許遷上言河東賊軍
侵我今月十一日遣步軍都指揮使孫繼業等領兵三
百至州北長壽村掩殺獲賊砦將程筠軍使冒千王仁
原供奉官李演竝駝馬等所獲賊將校竝斬之不數日
賊引軍攻城四面齊進臣與判官李昉都指揮使趙太
糧料使王光裔官員職掌百姓守把拒鬪焚賊攻具死
者五百餘傷者千餘信宿遁去詔曰兇狂烏合來犯軍
城醜類蜂屯罔識天命汝誓平國蠹固彼人心率驍銳

以前衝履鋒鏃而直進機籌神助部伍風生偽將活擒
殘妖碎首心堅鐵石城固金湯蛇豕既殲梯衝竝焚孽
豎偷生而遁迹雄師賈勇以追奔言念忠貞愛無倫比
嘉賞愧歎再三不忘時劉崇以朝廷初定徐方用兵遣
子均領兵出陰地關侵晉隰以觀人心至是挫衄而退
窺覲之意稍息矣是月安平兵馬監押馬彥珣言契丹
入寇出兵掩襲奪下老幼人口并牛馬各付其家

三月徐州行營都部署王彥超遣供奉都知孫仁安馳

奏收復徐州賜仁安錦袍銀帶絹百疋銀器五十兩甲
戍羣臣詣廣政殿稱賀其月己卯潞州常思奏差人部
送涉縣陣所捉到之賊將校長行共二百六十五人馬
三十四匹赴闕迴詔曰卿推敵有方執俘甚衆據茲惡
黨固有常刑但念彼之賊軍悉是朕之赤子遭罹兇暴
迫脅征行以至就擒良亦可憫察其情狀奚忍加誅配
於邊遐亦所不欲其賊軍竝已釋罪各與衫袴巾履遣
供奉官張謹管押至河東界首放歸本家諒卿明敏當

體朕懷常思上言招誘到熟吐渾李骨卑四十一人

八月鎮州何福進上言平山西殺山東賊軍數百餘人
十二月樞密使王峻征并寇遣供奉官梁义秦臣部領
大軍至晉州翌日遂攻劉崇焚燒其砦柵棄甲遁去臣
當時入城鎮安撫遣行營馬軍都指揮使仇弘超左廂
排陣使陳思讓都排陣使藥元福右廂排陣使康延沼
等領騎軍掩襲賜梁义錦袍銀帶庚戌宰臣百僚內殿
稱賀

二年正月鎮州何福進令指揮使王斌領先擒獲河東賊軍二百二十人馬三十匹至京師各賜巾履衫袴竝釋放

九月樂壽縣監押杜廷熙言於瀛州南殺契丹三百餘得馬四十七匹

三年正月定州言契丹三千攻圍義豐軍遣定和都指揮使楊弘裕選兵二百夜斫寨殺蕃酋綰相以下六十人得馬八匹契丹遁去

世宗顯德二年十二月淮南道行營前軍都部署李穀
上言副部署王彥超敗淮賊二千餘人於壽州城下又
言先鋒都指揮使白延遇敗淮賊軍千餘人于山口鎮
三年正月侍衛都指揮使李重進差人馳騎上言敗淮
賊三萬餘衆於正陽鎮東追殺二十餘里勦戮殆盡生
擒賊將咸師郎戈白約三十萬衆馬五百餘匹帝大悅
詔書褒之文武從官皆稱賀焉

二月朗州節度使王進達上言領兵入鄂州界攻下淮

南長山砦殺賊軍三千餘衆三月鐵騎右廂都指揮使
高懷德上言殺廬州賊軍七百餘衆於其城下是月行
光州刺史何超上言偽光州兵馬都監張承翰舉城內
附其偽刺史張紹單騎而遁文武從官稱賀既而授承翰
遙領集州刺史庚子馬軍都指揮使韓令坤差牙將押
降到偽天威指揮使曹延嗣等一千二百餘人至行在
賜物有差又舒州刺史郭令圖上言今月四日收下舒
州其偽刺史自溺而死餘黨皆遁文武從官稱賀壬寅

朗州節度使王進達差牙將捉到押送淮南賊將陳澤等馬軍都指揮使韓令坤差人押先降到天張賊軍朱重進等千餘人到行闕賜衣物有差

四月韓令坤自揚州差人馳騎上言敗吳寇萬餘衆於秦州路獲賊帥陸萬俊

是月韓令坤又上言敗楚州賊將馬在貴等萬餘衆於獲頭堰偽漣州刺史秦進崇等殿前都指揮使張永德上言敗泗州賊軍千餘人於曲溪堰

七月廬州行營都部署劉重進上言敗淮賊千五百人於廬州是月濠州行營都部署武行德上言敗淮賊二千餘人於其界八月壬寅張永德上言敗淮賊千餘人於下蔡橋東獲樓船二隻掉船五隻

十月昭義軍節度使李筠上言差行軍司馬范守圖領兵入邊州界殺獲河東賊軍三百餘人兼擒送員寮數人赴闕

是月壬午任永德上言敗淮賊千餘人於下蔡縣淮北

岸獲戰船數十隻賊衆溺死者甚衆

是月淮南道行營招討使李重進上言吳人寇我盛塘等處差鐵騎都指揮使王彥昇等率兵掩殺斬首二千餘

級

十一月壬子黃州刺史司超上言敗淮寇千餘衆於麻

城縣北

十二月己卯海州刺史張廷翰上言敗淮賊五百餘衆

於北界

是月戊子李重進上言敗淮賊二千餘衆於塌山北

四年正月丁未淮南道行營都招討使李重進差人馳騎上言敗淮南援軍五千餘衆於壽州城北奪得砦兩所及獲軍需器械等是日隨班於廣政殿稱賀

二月辛酉淮南道行營都監尚訓上言敗淮賊二千餘衆於黃耆砦

三月甲午廬州行營都部署劉重進上言殺淮賊三千餘人於壽州東山口乙未宰臣樞密使已下以王師大

捷各進馬稱賀

五月劉重進又上言於航步鎮金牛砦廬江縣相次殺獲淮寇獲賊船三十餘隻詔褒之

是月權知府州事折德愿上言敗河東賊軍五百餘衆於夾谷砦斬其砦主都章都監張釗等璽書褒美之

九月龍捷右廂主柴貴上言敗淮賊千餘衆於木林山十月昭義軍節度行軍司馬范守圖帥師入河東界收降下賊砦二所

是月田州節度使楊信上言盛唐縣兵馬都監薛支柔
敗淮賊六百餘人於田州北界

是月招討使李重進上言攻下濠州南關城十二月李
重進上言偽濠州團練使郭廷謂已下以其城降濠州
平降其卒萬餘衆獲賊糧數萬石

五年二月右龍武統軍趙贊上言敗淮南賊軍五百餘
人於石潭橋

是月黃州刺史司超上言領兵破淮南賊砦二所殺賊

三千餘人兼擒偽舒州刺史施仁望來獻

五月鎮州節度使郭崇上言帥師攻下東城縣斬級數百俘人口牛畜三萬餘衆先是戎虜以駕在淮南遣騎萬餘掠我邊境至是故有是舉以報之也

六月昭義節度使李筠上言帥師入河東界破賊砦六所於石會關

十月邢州兵馬留後陳思讓上言西山巡簡使楊璘領兵入遼州界收降下才砦兩所獲生口牛羊具數以聞

十一月己未邢州上言西山巡簡使楊璘破遼州賊界
井口砦擒殺百餘人

是月昭義節度使李筠上言破遼州賊界長清砦擒偽
磁州刺史李再興來獻

十二月西山巡簡使楊璘領兵入遼州界攻破牛居砦
一所斬三百餘級

六年五月定州節度使孫行友上言率師攻下易州擒
偽刺史李在欽來獻命斬於軍市己酉先鋒都指揮使

張藏英上言敗胡騎數百於瓦橋關北兼攻下固安縣
已已侍衛使李重進上言敗河東賊軍五千餘人於北
井路斬二千餘級

六月晉州節度使楊廷璋上言率所部兵入河東界招
降下堡砦一十三所兼下偽西南面巡簡使斬漢晁已
下三人

冊府元龜卷四百三十五